

Lavur è il meglier med cunter povradad»

Partida liberaldemocratica ils liberals

DA GION NUTEGN STGIER / ANR

■ **Cusseglie federal Johann Schneider-Amman ha admonì delegads e delegadas da la pld grischuna a la consequenza dad in gea a l'iniziativa per ina paja minimala. Cun ina paja per ura da 22 francs avessan cunzunt las interpresas pitschnas e mesaunas fadia d'exister.** Grond interess per la radunanza da delegads e delegadas da la pld da noss chantun glindesdi saira a Cuir. La sala en il B12 era occupada cumpletta-main e liberalas e liberals èn vegnids per far onur al minister d'economia, cusseglier federal *Johann Schneider-Ammann*. El saja vegnì gugent en la chapitala grischuna ed in summa saja il Grischun e cunzunt Guarda in lieu nua ch'el sappia adina puspè vegnir tar forzas. In dals dus represchentants dals liberals en il cussegl federal ha tegnì in referat cun il tema central, l'iniziativa da l'Uniun dal sindicat svizra che vul introducir ina paja minimala da 22 francs per ura che correspunda a radund 4000 francs per mais. Lavur saja il meglier med per povradad e betg in auzament da la paja, ha ditg il giast da Berna. Ultra da quai saja meglier dad avair lavur cun ina paja modesta che dad avair nagina lavur, ha accentuà il cusseglier federal. Ina paja tenor la lescha fetschia il pli grond donn a quels che avessan da profiter da l'iniziativa.

Giuvenils desistissan eventualmain ad in emprendissadi

Johann Schneider-Amman ha er fatg attent a las pajas en noss pajais vischins sco per exempel la Germania cun ina pa-



Taidlan cun tensiun ils pleds dal minister d'economia: Johann Schneider-Amann, cusseglier federal, Silvio Zuccolini, schef da medias pld grischuna, Rudolf Kunz, schef da fracziun e cusseglier guvernativ Christian Rathgeb (da san.).

FOTO G. N. STGIER

ja per ura da stgars diesch euros ubain la Frantscha cun in paja dad 11 euros per ura. Cun introducir ina paja minimala da 4000 francs per mais savessan giuvenils eventualmain renunziar da far in emprendissadi cun gudagnar dapli senza ina scolaziun. Quai saja en tuts cas d'impedir en ina terra sco la Svizra che saja in bun exempel per ina scolaziun exemplarica. Il sistem professiunal en Svizra funcziuna bain cun las tariffas da pajas tut tenor regiun. Ils iniziants cun il sindicat, che han lantschà l'iniziativa, pretendan bain ch'ils partenaris socials e las branschas professiunalas sa tegnian betg a la convenziun e gist quai saja betg

uschia, ha menziunà Johann Schneider-Amann. Negativas consequenzas avess in gea a l'iniziativa cunzunt per ils manaschis pitschens e mesauns cun quels betg pli esser abels da concurrer pervia da las pajas pli autas. Pertutgads fissan cunzunt affars da la gastronomia e dal detagl da commerzi sco er ina rotscha manaschis purils. Ils liberals grischuns han lura er decidì cun 95 tar nulla vuschs da refusar l'iniziativa. Decidì han delegadas e delegads lura er da sustegnair la cumpra dals aviuns «Gripen» e quai cun 90 tar nulla vuschs. Ditg gea han els er al provediment da basa medicinal e quai unanim.